
“NEFTCHI”DA HUJUM CHIZIG’I KUCHAYMOQDA: KLUB IKKI YANGI HUJUMCHI TRANSFERINI E’LON QILDI

3 yillik tanaffusdan Superligaga qaytgan Farg’onaning “Neftchi” jamoasi yangi mavsumda chiroyli o’yinlar bilan muxlislarni xursand qilish maqsadida tarkibini kuchaytirmoqda.

O’tgan kunlarda jamoa tarkibiga yana ikki iste’dodli futbolchi kelib qo’shildi. Dastlabki shartnoma so’nggi davrda Belarusning "Energetik-BGU" hamda "Shaxtyor" jamoalarida to’p surib kelgan Shahzod Ubaydullayev bilan imzolangan bo’lsa, kuni kecha serbiyalik yosh va iste’dodli o’yinchi, Serbiya Superligasi vakili “Metalats”ning asosiy tarkib hujumchisi Marko Sharich ham jamoamiz tarkibiga kelib qo’shilgani e’lon qilindi.

Ayni damda Turkiya yig’inida bo’lib turgan "Neftchi" jamoamiz tayyorgarlik jarayoni doirasida rejaga kiritilgan nazorat-sinov bahslarini o’tkazib kelmoqda. Ilk uchrashuvda Kosovo Superligasida 4-o’rinda borayotgan “FK Lapi Podujevo” jamoasi bilan 1:1 hisobida durang qayd etilgan bo’lsa, bugun farg’onaliklar Rossiyaning “Fakel” (Voronej) jamoasiga qarshi maydonga chiqishadi.

[Bizni ijtimoiy tarmoqlarda kuzating](#)

[Facebook](#), [Telegram](#), [Facebook](#), [YouTube](#), [Instagram](#)

2022-02-02 17:18:19